

半行庵詩存彙

余去歲罷官東旋其冬僑寓吳門始與都人士相見有言
貝子子木遺集者將鳩貲付刻索其詩讀之覺其有異乃
終其卷且反覆之不忍舍美哉詩乎其數十年寢食於此
者乎其沈雄堅卓胎息於少陵無一字一句不錘鍊而成
者乎其得江山之助與其胸中奇氣相摩盪以出之者乎
余於是知有子木且知是爲子木之詩因復詢其生平蓋
具有幹濟才壯年嘗佐揚威奕將軍戎幕不避艱險冀有
所樹立旣而無成功乃往游京師歸復之浙又嘗之黔之
滇之蜀足跡半天下而卒窮愁落寞患難顛倒以底於死
初庚申之變子木自浙迎母以去越歲杭城再陷母子相

失子木出沒死生尋母不獲負罪引慝無地自容不得已
就直隸制軍劉公之聘未及相見道卒旅邸嗚呼文人之
窮一至此哉顧子木之卒也劉公卽馳使殯殮如禮且致
書其家又厚賚之俾迎其喪以歸終葬於先人之墓是子
木不得志於生前猶幸遇賢主人於身後是誠劉公之高
義又孰非子木之奇才名動公卿有以致此哉昔乾隆中
吾鄉詩人黃仲則終身坎壈殆與子木等至於今兩當軒
集風行海內子木之詩時有與仲則相似他日半行菴集
當與並傳不朽乎子木佐戎時嘗有咄咄吟二卷具載當
時軍中利病今不及刻刻其編次成帙者工旣竣請序於

余余與子木素昧平生不宜有言言之未必盡然讀其詩
愛其才悲其遇惻惻焉若有不能以已者爰就所見於其
詩及後所聞約畧詮次如右尙望都人士習於子木者詳
言之以補余之不逮也同治五年丙寅冬仲陽朔輝世臨
次山氏

毒熱鹽汗百務頽廢手扇無停麾在謝城孝廉觸暑枉過
出一編示予則吳門貝明經遺詩其友葉翁調生與同志
將爲付刊者也追暑無術倚北窗讀之苦心孤詣蓋篤於
詩亦達於世故者貝子中年從戎浙水繼復幕遊滇黔梯
空縋幽星飯水宿不廢鉛槧境苦而詩益工實能鎚鑿天
險雕鐫世態倚船唇而構想磨盾鼻以嘔心語奇而卓筆
紆能達言之有物義歸勸懲不戾於風人之旨不乖乎古
作者之心勤矣哉葉翁與諸子復爲之訂訛補佚存詩如
千首貝子於是可傳矣乃予重有感焉吳下詩人予少交
在惟得江子弢叔其詩亦精心結撰不肯著一尋常吟弄

語其慘遭家難復與貝子略相似貝子以諸生應北直劉
制軍聘在途病卒身後得制軍厚卹而未展其才江子以
諸生屈於一尉雖邀徐樹人中丞賞識僅餉其口今亦病
沒杭州才人坎壈有同慨矣顧江子所簪伏散堂集續刻
已成傳世可必貝子之詩則屢經散失幸而僅存非得良
友爲之珍護愛惜壽諸梨棗不幾與羹瓿同灰寂滅而無
聞耶予雖不識貝子而深有感於文章憎命又重念夫友
朋之不可少也如是故不敢方葉翁之命忍暑停扇書數
語於首并質之謝城儻謂予遂足以序貝子而傳其詩則
吾其敢同治丙寅新秋七十二叟當塗黃富民

自序

余初不解吟事年二十八遇朱丈綬聞其緒論始粗識師

承然畏難未學也閱十年遇益困憤懣欲有言葉丈廷珪

從而激獎之遂委志於詩然飢驅四方雖好吟究未學也

峽江之役舊著全亡竭思省錄十僅存五所幸半生游跡

尙可髣髴得之恐再遺忘姑編如左若云學詩終須異日

吳縣貝青喬子木

半行庵詩存彙目錄

卷一

古今體詩九十九首

卷二

古今體詩九十六首

卷三

古今體詩一百二十三首

卷四

古今體詩九十八首

卷五

古今體詩一百三十三首

卷六

古今體詩一百十三首

卷七

古今體詩八十六首

卷八

古今體詩八十首

半行庵詩存彙卷一

吳縣貝青喬子木

芳樹

芳樹臨前除華蕤何窈窕倡條拂綺筵繁英被豐艸春風
吹汝榮春風吹汝老

真娘墓歌

一片情天石難補海湧峰頭掩香土哀燈下照嬌靈棲啼
斑留蝕翠珉古鬼花開不紅結璘慘流碧綺夢何沈沈長
夜永無白歡儂不解含古酸離姬蹋醉來姍姍

春閨怨

膠鬚慵盤鏡裏鴉香幃愁掩日西斜
歸期祇有春光準樓外輕寒又落花

山塘卽席贈李如金

別緒十年長追歡復此鄉金隨歸路盡鬢比故山蒼
冶跡留詩卷芳時逝酒漿今宵烟水際記取月茫茫

一角

舊時檀板舊時絃一角紅牆遠似天
贈別尙留青玉案寄詩空賦綠珠篇
生憎燕子巢香幙可奈楊花墮翠烟
此意如環復如玦曉風扶夢畫樓邊

遙夜曲

素娥碾碎玻璃魂啼紅怨綠雙淚痕雌絃幽咽不成寐玉
笈懸影封秋門夢裏騎鯨撒波去孤煙一縷長洲路黃衫
何處覓桐郎十二玉樓迷故步破鬟倭墮銀屏寒雄雞翦
夢明星闌起對駛駮翠蓮影鴛鴦穩臥金句欄

金山

淩虛倒瞰渺無垠杖底魚龍氣不羣東下天光江海合西
來秋色楚吳分帆檣亂簇中流樹樓閣圓包一寺雲閒與
山僧談往事妙高臺畔立斜曛

棲霞道中遇雨

羣山忽走匿雲氣塗滿空急雨猶未至萬樹搖當風我行

正絕巘策蹇迷所從前瞻得古剎斜下穿林叢枯僧訝客
到勞苦殊怱怱迴顧所來徑倏墮烟靄中一罅漏天影日
腳輝青紅下照見城郭萬瓦秋濛濛雷聲漸以遠鳥外明
一虹出門問前路溼雲隨我東

燕子磯阻風

江風刮沙沙亂旋晝暗如夜飛溼烟長年恃勇翦江渡一
浪打人水半船迴帆直撲巘磯闕疾似霜天落蒼鷗又防
沙齧猛一撞力向千篙萬篙竭同伴慰勞相告存我翻失
笑傾一樽魚腹祇應葬騷骨豈受齷齪征夫魂須臾船趲
吹漸息重雲催暝半江黑蘆中窮士去何之醉蹋寒沙弄

秋色

宏濟寺

中山遺墅結禪薰
榔櫟隨身躡夕曛
疊嶂盤空危壓寺
怪松穿石倒懸雲
暝帆欹影當窗度
風隕吹香入座聞
不見將軍留大樹
翻因捨宅溯元勳

清涼山

炎氛吹不到林壑
悶幽香梵罷歇秋
雨客來沈夕陽風
榛蔽迢坂烟篠媚
崇岡還問棲禪衲
鐘魚何爾忙

元御史大夫福壽墓

紅塔光騰國勢孤
繡衣南甸握兵符
圍城守死完臣節
新

牛行眉言在真
卷一
三
主褒忠葬敵俘史閣羞聽危素履經筵甘附比干圖鳳臺
門畔棲神地千古青燐走碧蕪

有贈

滿舞容歌嬾入尋小茶覲處爲沈吟十年願祝司香尉莫
誤樊川到綠陰

秦淮贈張鴻基

風中玉簫雨中鈴十載江湖帶雨聽今夜聯牀尋舊夢涼
蟾吹影滿秋屏

金迷紙醉意闌珊賭酒紅橋水一灣如此烟波如此客捲
簾羞見六朝山

報恩塔

皇覺寺羅永庵祖孫兩帝棲佛龕中開殺運三十載底事
建塔皇城南周公不輔成王子忠盡禍延瓜蔓死窮飾土
木稱報恩安必諸天大歡喜當時誰實啟篡謀髡緇填籍
燕府游後來披薙有嚴禁得無漢王將效尤迄今明社久
成屋金碧九層猶在目危欄下俯舊陪京孝陵衰艸連天
綠

歸舟同程

集義

作

槐黃忙甚事屢過石城灣游跡詩囊裏朋情酒榼間一颿
揚子渡雙展蔣侯山聊壯歸人色秋風覓舉還

家大人邀集同人遊西山夜宿法螺寺作

行客返里門三日息塵鞅登樓見家山煙霞結遙想鼓興
互招邀出郭信輕桡凌晨微雨過蒲稗夏清響繫纜就墟
烟振策踰樾壤孤暉隨徑深秀巘入秋爽晴靄淡多陰涼
翠引邁往晚餐款齋廚宵燈掩禪幌卻憶江上山蓬窗列
如仗危磯燕掠波浮玉螺貯益歸伴苦相迫捫蘿誰與上
及茲遂幽討用慰夙心快明發躡層雲整理芒鞋兩

宿環山閣

秋籟滿巖壑涼風吹上樓挑燈驚雨急開戶帶泉流雲氣
侵衣冷烟情入夢幽曙光晴可喜檐際衆星收

覺海寺採桂

風吹青桂林嫋嫋山之趾妙香先迎人去寺尙一里幽尋
披莽入濃陰撲地起濛濛秋翠中黃霰落如綺止水澄寒
潭游禽哢遲晷坐久舒遐蹤談深引遙企寂然了聲聞拈
花究微旨

暮至花山寺上蓮峰頂

頽陽匿崑嶙衆牝積陰翳倭遲篆路中榛篁互虧蔽坡轉
陡光明呀然露峰髻紺殿蟠其根噉莽從所憩指點青茵
舊亭亭立雲際怪松鬱垂蓋懸棧固盤蒂懾險笑羣懦踐
夕勵孤銳登頓薄天衢迴出人間世仰捫晝有星俯躡暝

無地一氣明晦間衆頂攢瑣細貢湖三萬頃練影付搖曳
去美景不延來奇日將曠眷眷下烟蘿一燈寺門閉

自一綫天上天平山絕頂歷蓮花洞須彌嶺諸勝

吳山皆戴土延互無垠塢巨靈一掌下萬笏出新鑿梯空
豁家弄剏中孕禪閣春蕙媚羣眺士女盛游屨孰知九秋
後舊峭乃勝昨奇礪立積鐵壓鳥巨峯落陰竇潛穎闕陽
林壽藤絡坐使層厓上跼步不容拓後頂接前踵綬路入
寥廓俯窺無底雲齒戰及吾喁呖軋天貌隘慘續日容薄
迴駕臥松寮惴惴夢猶噩

雨中作

渾渾波底天，械械風裏木。黑雲愁殺人，三月壓吾屋。河魚戲新浪，前夜跳上陸。閭門殷軋區，飢色忽到目。況彼墟里間，慘慘向誰告。搔首盼晴陽，城邊飛一鷺。

城邊窪下區，水深泥沒踝。編木浮作橋，滑滑走車馬。聞見日數驚，安堵亦已寡。惡少夜禦人，白梃破檐下。彼豈樂此爲，念之淚盈把。側耳哀鴻聲，嗷嗷滿四野。

四野夫如何，水至蕩爲藪。浪頭一丈高，漂沒大隄柳。十室僅有存，多半向城走。汨汨鳴漸中，鰕鰖對雞狗。畫船爾何人，看水到村口。坐賞天上雨，滿引杯中酒。

寄顏三 元禮 楚幕

墜葉滿庭際秋懷江上生一傾吳市酒三載武昌城慷慨
登樓賦艱難負米情何堪彭蠡雁天未起悲聲
客至話荊州愁霖歷夏秋江風衝岸裂潮水入城流人氣
千艘散炊煙萬竈收參謀蓮幕底隄障急綢繆

又道湘江畔荏苒偶盜兵箐林朝伏弩救炬夜窺城土瘠
人多悍年饑命愈輕妖氛容易埽辛苦念民生

故鄉原澤國亦復雨沈沈晴日不照地溼烟常滿林鷺饑
田父淚閉糴富商心安得豐年樂江湖寄好音

悲廩民

癸巳冬吾郡大水旣荒且疫道殣相望 家大人

憫之倡捐設廠東虹橋側衣之粥之越明年三月
乃止凡活千餘人嗚呼天災流行雖曰代有亦人
自取也聽觀所及輒形於詩

吾蘇佳麗地百族充市廛攘攘游食徒競聚如附羶不農
亦不末積懶成自然擣蒲晝爲業暮夜酣洋烟儕輩互徵
逐骨肉皆棄捐樂歲不自保遇歉斯倒懸活之亦無用可
忿仍可憐終以在墊溺忍心難舍旃困極或生悟冀其懲
前愆羸病飲之藥凍皴披以棉恩怨兩不在要在全其天
明春土脈動去去畋爾田

東廠居羣男西廠貯婦女開廠衆爭集三三復五五按口

給之粥自朝喧至午或云義振法宜散不宜聚恐有姦宄
生小恩難用撫豈知不軌徒養之如養虎飢或相吞屠飽
乃戢其武伊昔列肆間非理橫攫取捨生謀一飽雖悍亦
良苦閉置斯廠中庶幾得其所莠民旣得所良民斯安堵
還須慎殘年守望相爾汝

戚戚重戚戚有婦登廠門簞豆若弗屑涕泗朝復昏詰之
不肯道鄰媼爲前陳云是富家婦豈習苦與辛前此三四
年窶窵如天人雙鬟左右侍暝怒皆生春在福不知惜飄
若風送塵四體旣嬌慣焉能支驟貧殘喘亦何戀不幸身
尙存躑躅風雪中告哀誰肯仁聞言我三嘆榮悴良有因

憫彼機上女寒餓纏其身

愁霖恣凋瘵惟農實受之三時筋力盡收穫乃若斯輸納
罄其室追比還遭管振城不振野何以補創痍農民罹其
困情民蒙其施竊恐畎畝間游惰日以滋區區設厥心耿
耿良在茲願奢力弗繼坐臥成歎咨從容徧撫恤是在良
有司巨室競捐助胥吏皆仁慈分彼飽者飽惠此飢者飢
罄罄千萬戶霜被庶無遺

送友人之瀋陽

歲晏不得息嗟君茲北征河水朝渡馬邊雪夜投城親老
求名急家貧作客輕三年堅有約捧檄佇相迎

洋洋海水篇爲沈孝子 仁業作

洋洋兮海水迢迢兮南荒阻華夷兮相望望不見兮崩中
腸兒不知世路之崎嶇兮兒知父母兮不可忘一解兒生交
趾行年七歲從父歸故里羣兒聚嬉兒獨無母以恃對父
愉其顏背父淚下流泚泚念我母天涯海角不得覲止二解
望我母兮海湄告我父兮願迎母歸父曰海疆屹嶮干戈
讎起汝其勿往往且莫知生死對父哽不言背父淚下流
泚泚念我母飢奔兵竄不得覲止三解驚風夜來喬木且摧
孤雛睢瞿瞿霜雪紛以皚羣兒聚嬉兒獨煢煢孤子陟岵
哽不言陟岵淚下流泚泚念我父母生離死別不得覲止

四解天梯猶可攀弱水猶可航涕泗誓父墓迎母歸吳閭母

歸兒亦歸母亡兒亦亡親戚走相送哭聲繞河梁切切相

勸止意決無傍徨五解洋洋兮海水迢迢兮南荒舟兮車兮

趨我母旁故巢兮破裂戈矛兮森列蠻觸鬪兮未滅兒不

見母兮椎心飲血兒惟母是求兮匍匐虎穴遇我母於僻

道兮慘上下神祇而共絕六解洋洋兮海水迢迢兮南荒舟

兮車兮歸我母兮吳閭骨肉同堂大歡喜兒心耿耿悲未

已對母愉其顏背母淚下流泚泚念我父地下黃泉不得

觀止七解吁嗟平海可以枯石可腐此生缺陷何時補天高

高照下土孝子心萬萬古八解

西磧山展祖墓

累累狐兔宮荒荒樵牧火裔孫來已遲
彌望愁雲鎖松柏摧爲薪蕪雜藝花果久愴拜奠疎
相傳葬時誤於地師之言展謁者輒不吉以故
百餘年不墓祭 阡表日傾移舊封幸未夷三尺掩蓬顆孰知此中
人綿延實生我春源溯流長秋根悲葉墮衰祚支僅存陰
相澤猶荷歲展番祭誠先靈庶永安

雨夜渡上崦至礪上草堂宿翌日游石壁萬峰臺珍
珠塢諸勝雜成六絕句

齧岸濤聲漱石稜箭涇西去夜光激一星飛出叢蘆隙知
是漁燈是鬼燈

剝啄聲從定裏聞
齋廚分飲入微醺
今宵暫拔塵中腳
借箇蒲團臥白雲

跨路泉紳瀉一條
老禪門外畫蕭寥
苔花寸厚無人跡
豆大蝦蟆歷亂跳

銅坑銅井路盤盤
萬綠陰濃五月寒
靜裏一聲梅子墮
野風吹雨帶餘酸

蓋頭圓笠受風偏
雨氣隨人入半天
頰首下方應笑倒
阿誰凝立萬峰顛

梅花香夢十年曾
此日登臨溼翠凝
盧橘滿筐風滿衲
亂雲堆裏見歸僧

西湖

載得詩情至晴漪撥棹輕春聲欣雨歇秋抱愜山迎花氣
香諸寺湖光溼半城底須爭勝踐孤賞到鷗盟

靈隱寺

晴旭漾空翠和煙侵客衣泉聲漱石冷峰勢入雲飛伎佛
香成市探花妓合圍山靈應厭此一雨鎖巖扉

雲棲

曳杖經西塢盤岡入幾層雲封千頃竹禪定一堂僧虎穴
驅俚淨龍泉貯液澄蓮池開法界別派衍傳燈

理安寺

螺旋入巖腹滃然竹徑幽泠泠滿清聽諸磴雨初收禪味
淡於水客衣涼欲秋高攀符夢閑彌望絲雲流

西興渡

落日廣陵路孤帆蒼莽間白翻吞岸浪青截過江山暮角
催人發眠鷗媿爾閒前途多美酒須破客囊慳

大滌山

夜夢墮巖綠曉隨雲共升靈禽春擣藥古洞晝然燈舊跡
金仙印飛塵玉殿凝九關深鎖處倚杖劇峻嶒

洞霄宮

鄧公棲息處洞府抗遙氛厓翠定中落林香空外聞斷梁

明古雪飛瀑濺晴雲願駐方壺景歸途眷夕曛

禹航獅山

沿郭二三里徑山分此支名僧風穴寺古祀石郎祠出樹
標孤塔環溪障一陂南朝留輦路想像翠華馳

秋園雜詠

修梧百尺強垂蔭覆蘿徑脫葉驚早秋立幹抱孤勁材非
不中伐在曠適真性彼哉賞音人爨下收餘燼何如天籟
鳴涼吹聚虛聽

霜降衆芳歇疾飈吹未休籬菊有佳色孑然挺窮秋豈伊
天地私植根良不侔土荒萎未盡時至榮自拙候蟲爾何

感悽響滿林陬

送吳

山秀入蜀

投老去爲賈艱難成此行一帆風雪裏渺渺數江程臘酒
棲湓浦春燈入錦城莫嫌羈旅苦隨路好山迎

六泉叔命題鍾進士出獵圖

深林月黑風亂旋有怪非怪仙非仙
譚譚出出紛來前兩鬼趨捷昇一
簣兩鬼劍笠肩上肩鬼雛蚩蚩奔
在先鬼妾從之慘不媽彼小而瘠
立左偏或竿或甕峙乃羶是何老
魅居中權中山進士大且髻排衙
結隊山之巔張皇一第誰爾賢
方今午運當中天鬼物之神何有
焉我惜馘腹徒

便便爲此魑蜮流饒涎區區么磨何足憐畏爾媚爾執爾
鞭背爾竄竊肆厥姦爾果翦崇靖下泉終南捷徑猶赧然
泥復四走驅妖烟猖狂羣孽同游敗我今檄爾詩一篇爾
其遁跡毋流連

除夕飲吳

山秀

齋示令子

金聲

香消文鼎柏留燼冰裂瓦盆梅作花入室依然共杯酒有
人風雪正天涯

寄武林諸子

吳淞歸興愛鱸肥靜掩東風雨版扉南浦新愁春水闊西
冷舊夢柳花飛青門客散霜侵鬢紅豆歌殘淚點衣惻悵

魚書傳到處湖烟漠漠雨霏霏

虎邱絕句

一垂楊畔一紅樓樓上風簾盡上鉤大好吳儂游冶地祇
憐花事不禁秋

聞笛桓伊喚奈何古桐橋畔綺情多年年耐得春人夢幾
度銷金入此鍋

村田樂府擬范石湖體二首

浸稻種

清溪一曲水紋繞穀雨家家初長稻不蠹不腐新穀香若
者宜遲若者早東家昨日挑河泥澆遍稻田田易肥今朝

陌頭撒穀種零星不管密與稀十日五日種出土十科五
科仔細數插秧只待秧鼓敲傲倖農家生計饒西鄰老翁
淚如涌生男無力墾田隴去年典穀贖冬衣今日典衣贖
稻種

演春臺

前村佛會歇還未後村又唱春臺戲斂錢里正先訂期邀
得梨園自城至紅男綠女雜沓來萬頭攢動環當臺臺上
伶人妙歌舞臺下歡聲潮壓浦腳底不知誰氏田菜蹋作
齋禾作土梨園唱罷斜陽天婦稚歸語村莊前今年此樂
勝去年里正夜半來索錢東家五百西家千明朝竈突寒

無煙

西津晚興

上冢船歸暮色微斜陽欲落故依依半筐風簸田夫麥一
桁晴收浣女衣甕漉梨花春釀熟盤登豆筴野筵肥輕撓
幾曲楓橋畔近水人家月滿扉

夜宿唯亭

野屋婁江夜寒燄照獨眠蛤潮涼吠月螢火溼流烟爽氣
澄風曠晴光漾水田麥秋天作冷愁到客衾邊

題程三沂梅室

蕭然一榻擁蟬編爲伴梅花愛獨眠病趣幾隨禪共定朋

交多借酒爲緣屈醒陶醉吟分格焦卓張顛飲入仙門外
紅塵飛十丈風吹曾未到君邊

訪劉彥冲

市隱謝塵事端居心悄然霜花鋪几厚風葉走階圓薄飲
徵詩味雕談入畫禪歲闌多俗擾羨爾掩關眠

懷張大鴻基

張也真吾友奇懷鬱未開狂招多口忌貧鍊一身才咳唾
皆詩卷淋漓有酒杯相思不相見愁絕隴頭梅

元夕戒幢寺玩月圖葉道芬屬題

燈市趁妍晴坊曲競爭麗誰知塵熱區月凍霜滿地吟儕

避游氛禪窟恣幽憩循除水一泓湛若鏡無翳冰開影倒
涵虛明勝仰睇夜氣澄化烟搖光上林際驚曙誤棲鴉噉
空聲遠曳促歸更告闌畱玩戶遲閉此時嬉春人醉枕夢
成嚙

偕程

集義

積善西院探宋梅

東風漾晴旭暖入孤剎內花氣蒸作雲晻曖呈萬態游蜂
導客至春聲喧一隊款關悵前事裙展盛高會勝流散若
星芥壁句猶在此樹七百年獨超塵劫外貞心蘊古香殘
幹駁新黛不知自我先酹酒曾幾輩姑畱今日題竹發後
人慨驗罷林晷移初景渺難再

家大人暨六泉叔邀同印丈 康祚 葉丈 廷珪 程丈 庭

鸞 往游陽山大石歸命作詩卽步程丈原韻

探奇饒勝緣游侶羣輻湊整理雙不借入險鉅而走峭崿
秦餘杭箭闕兩厓鬪大石良其背卓立虬骨瘦孤撐出天
半直上比懸溜禪龕綴木末鍾乳滴巖竇靈蕤孕暖香霏
微入清飆是時春欲暮萬綠堆衆皴排闥駭枯僧避人竄
飢狄雲氣晴亙天陰寒撲襟袖屋後勢倒崩罅裂土花繡
磴道不受趾人跡所罕邁九泉自穴出謀耳暗中漱上有
古石梁如屋初架厠仰睇股先慄高陟矧敢又懷古摩蒼
崖剗苔索前鏤勝國諸鉅公健筆凌世宙山靈藉表章刻

剗到荒陬詎知三百載漫漶失句讀迴首跡已陳繼起誰
共副吾儕頗噉名或共古人壽紀詞疥絕壁永乞神鬼佑
路轉訪水簾數里穿雲透前導仗樵子趨捷若騰駒奔瀑
落峰掌歎飲循理腴下注陳小槽妥帖出天構積影搖夕
光明滅嵐彩收於焉慕幽棲僧廬倘許僦老湫窺螭龍蒼
嶺叩靈鷲會當躡仙蹤次第擷其秀藉日婚嫁畢新盟動
成舊戀戀下層坂林缺星光漏

悼來兒

東野無端哭杏塲子身後顧意茫茫何堪病婦來相慰搔
首風前鬢未霜

尺許香綳裏錦綾撫摩忍遽掩荒陞昨宵猶引重闌笑含
著芳飴弄一燈

呱泣猶思墮地時全家喜氣溢雙眉初心自笑癡何甚早
把門才望到伊

爲葉丈

廷珪

題詩壇點將錄

人才蔚起乾嘉會盟主東南運不孤賸聚風雲開筆陣指
揮壇坫下軍符幕分東廠翻新案派衍西江列舊圖迴首
詞場成一唱羣英無復滿江湖

食蟹五十韻用韓孟聯句體

水錯性素耽廚珍秋愈妙醫學士蘇餽寄吏部畢傲左手

供我持中腸。嗟爾躁俊品。微食經飽噉。拾吟料種以。螭蛸
分名以。鯁鯁號爬沙。行儼儼。乘潮隨。胸臍插。斲水障。籬開
蕩。風鳴。斐漁父。秋放艇。滂戶夜移。權塹兜支木。橫扈業懸
燈。照奔明。綠厓屈負固。蹲窸窣。若網前後牽。如荇左右芼。
塘撐羊。觸籬潑刺魚。在罩搜亡靜。屏氣得。雋欣失笑。鯨鯢
楚戮俘。萑苻鄭擒盜。腥市販夫集。馳道走。僉召手縛。菱紐
出肩負。竹筴到沫。噴珠作胎。箝張劍拔。鞘脇駢公子。曾睛
突。勇夫貌。選材指入跪。論價爭兩造。團尖月。分令輕重權。
執要入。囊輿莫逃。裹犀萬猶驚。爲我口腹累。引渠湯火蹈。
汲井溉。大甕斫薪燃。冷竈烹異兔。去尻蒸。類蜩鳴。竅么磨。

聚族殲巨魁拔尤報匡盜稍芒輪香升蘇荏導膳夫涎垂
流費朋心結嫪堆盤血濡袍解甲麵發酵味腥乞醢投性
寒屑薑療足折輿說輟背揭風吹帽頰黃桂塞輪瑩白雪
裝窖千析咀其華兩擘破厥奧臍鬚稂莠芟螯髮艾納繚
夾柴餘肪凝堆垛積骸掃壁蝶黏樹遺房螭塢皴匏大嚼
哂酖童遲齧憐豁耄頤面絀巾陳盥手茗槍漂兼味肉失
旨餘甘粥嫌糙質菊小鈴綴剖橙輒杯酌戰拇舞僛僛醉
纈視眊眊春狔鮮入供夏醬肥尤唯得之勝八珍合之成
三樂醉或松醪釀甜或蔗糖膠胥或粉羹糜醅或鹽豉糟
或潑以膏油紅醬煮廚鑿或封以穀糟碧醢窖堂窰幸得

異味嘗請爲同嗜告勿謂水族繁歲歉恆逢潦勿謂介蟲
集兵兆輒多暴樂此居江鄉尊前佐歌嘯

送顏元禮之贛榆

昨看江上花今折門前柳豈不戀鄉土衣食驅之走施嬌
不自妍俯仰隨衆醜四馳塵盞間無端廿年久天風振枯
木寒威逼疎牖置酒臨廣除慙歎別親友酒盡出里門殘
陽在河阜

河阜望行人杳杳暮烟裏暮烟四野合行人去不止目窮
帆影遙長路遂千里暝風吹酒醒返步猶迴企河流浩無
涯明月漾其泚我心不如月隨君戒行李一更照君宿五

更照君起

張鴻基

自閩中歸枉顧贈詩

三載不相見忽聞江上回帆隨春信至戶逐笑顏開坐撲
塵雙屐談傾海一杯莫嫌青鬢改豪飲氣如雷

和張

源進

詠燕

海燕歸來亦斷魂雕梁掃盡故巢痕人間祇重金環報莫
恃當年舊主恩

烏衣門巷古銅鋪和雨和煙掩夕蕪辛苦銜泥成一笑要
營香壘育春雛

楊花如雪撲烟沙易主樓臺掠影過何似秋風遶海上樓

身自帶小行窩

同程丈

庭覽游青黛湖

春游罷羣閨花事歇芳浦靜侶多遠懷人外曳柔櫓搖兀
菰蔣中枝港半迷阻豁然匳鑑開澄帖黛痕古瀕湖萬楊
柳濃陰日無午其下列魚田蘆界清可數村墮晝冥濛團
煙綠一塢風歌聞榜人水飯見漁女歸路明夕陽殘紅耀
林羽

爲葉丈

廷珪

題故友印

康祥

風雨聯吟圖

章逢聲不揚睽目永沈晦豪素跡僅畱縣世能幾代惟恃
承託人名山業同愛庶或五百年軼聞挂人喙印九古猥

者逸情邁流輩感彼雞鳴聲呼朋互酬對吟社倏淪亡手
澤半茫昧幸有平生親收羅到殘纘恍此尺幅間音彩展
猶在從可賦大招樽酒重沃醑故物恐遂湮後死責難貸
他日終付誰思之心孔痲

有懷

端居結離緒惻惻悲秋蓬展步出西郭登高來北風經生
伏不鬪酒客王無功天未數知已沈寥聞斷鴻

出胥口至東山翠峰寺循吟風岡上莫釐峰頂

若雪滙上流赴壑奔向東羣山東不住碎立洪濤中瀕海
不百里淩瀆皆要衝習流者誰子胥師出沒工夫椒背轉

戰餘艤收厥功及今募水勇一旅殊足雄棄之近盜藪後
時恐伏戎我來屆殘臘山寺寒濛濛回眺松栝外湖氣搖
晴空浪頭大如屋漁蠻方駕風

塵事芥吾曾歲除益輾轉置身山水鄉快若蛾脫繭入雲
復出雲盤折上晴巘遙闊三萬頃全湖落長眄海防設重
鎮三州此關鍵有明遘倭患江浙忍蹂踐豕蛇厲牙齒於
此會一翦承平今旣久杞憂難用遣何處率邑人黃髮共
繾綣世上有兵戈山中自雞犬

洞庭東山謁明路文貞公

振飛墓

妖氛纏北極逆黨燭南都竭力支淮甸餘生盡海隅香飛

梅嶺潔霜染桂林枯共抱厓山痛風枝泣夜烏

辛丑正月感事

登壇授鉞壯南征不信和戎早定盟海上鯨鯢猶跋浪帳
前戈甲自銷兵羌酋睡手成三窟壯士彎弓望四明獨有
籌邊樓上客偏教萬里壞長城

流民謠

江北荒江南擾流民來居民惱前者擔後者提老者哭少
者啼爺娘兄弟子女妻填街塞巷號寒飢飢腸輾輾鳴鳴
急無停聲昨日丹陽路今日金閶城城中煌煌憲諭出禁
止流民不許入

雨中過木瀆

撐笠投墟落瀕湖積潦平
施民隄作障開洫水爭鳴
客興稽風色農心碎雨聲
何堪桑隴畔戴勝正催耕

林師

則徐

遣戍西口道出吾蘇走送呈詩

荷戈急嚴譴王程難久羈
祭軼爭遠送私惻難睽離
請公暫停駕聽我陳此詩
公昔撫吳日甄孕靡或遺
賓館羅俊彥採及樗散姿
階前盈尺地許我揚雙眉
見公勤坐理萬彙臻繁禧
實心非異政鋟入民肝脾
是時歲屢歉舉目多創痍
開誠乳赤子悉隱恤彤墀
坐我在與席起我溺與飢
至今諸父老述之猶涕洟
昨日聞公至渾舍爭來窺
挽

船塞河止攀轅擁路歧遮留三晝夜罔顧官限遲喜公春
滿面惜公霜滿髭謂公鎮南服上契天心知島烟流大
毒一炬良所宜何爲里吏議褫職投邊陲顓蒙昧無識未
免生然疑我欲告以故亦復拙言辭惟云君子過日月有
盈虧圓魄施夜彩蝦蟇朵其頤麒麟地上鬪曜靈有食之
仰觀得其象四海皆嗟咨安用戍車側衆口憤所私獨此
別時景難爲去後思慙使岸旁柳攀折無遺枝幸勿中夜
發輕裝潛遠移迢迢天山路漠漠青海湄我知萬家夢今
夕先公馳而況門下士贈別將何持賜環定有日負笈詎
無時行矣貞所德昌辰以爲期

秋懷

繁霜集迢野秋聲吹滿壑萬象應商律颯爾風生棧在曠
營旣息有觸心彌矜浮脆歇餘媚貞抱留遠徵榮苑各隨
化凡傑紛待興安容百年內肩擔靡所承窮牖閱時邁華
髮催人增奄奄垂半生去沒世悲無稱

雜歌九章

北風吹決黃河口汴梁城外蕩如藪又驚聞浙軍書來厦
門甬江兩不守是時吾蘇樂有餘彼憂天者人謂愚八月
同慶聖壽節笙歌夜夜喧街衢

實我倉穀城我城倡議乃有鄉先生又聞大吏議防堵六

門設兵三百名錢江郵報寇氛遠三日聚謀謀漸緩天邊
星使紛南馳火速辨差置行館

有客有客議團練肝膽照人人不見或言避城或避山皇
皇逕欲棄鄉縣壯夫有血吹不涼酌酒誰與歌同裳三更
起拔長劍舞雄雞喔喔天雨霜

野雉飛匿草田裏知畏其首不畏尾陡然驚起復遠颺終
入庖人湯鑊底出門滿地皆網羅白奪如爾椎埋何秋霖
未集已先徙有智不如螳在柯

朝見兵船海上去浙東議戰要防禦暮見兵船海上來粵
東議和仍撤回兵船來往日如織官符捉船船戶匿商旅

坐愁行路難江湖滿地生荆棘

兵災水災相比連斗米五百青銅錢救荒有例免關稅日
望漢陽來米船霜風凜凜雨淒淒黃雀苦飢啄菜甲此時
民愁官亦愁糧艘已下丹徒聞

吸煙者絞販煙殺禁絕煙匪有嚴法爰書三載下縣官縣
官奉行編保甲黃流滾滾源不澄閭閻積嗜終莫懲兵塵
日近煙日賤白晝戶臥開帷燈

豫東築隄河之許一寸黃金一寸土海疆籌餉兼募兵司
農捐例新頒行富兒慕義爭報國上賞優至二千石嗟爾
下土棲蓬蒿閉門臥讀劉蕡策

朽無完襦甌無粟老妻瑣瑣辦冬蓄汝飢汝寒且勿言世上瘡痍紛滿目風棱刮面霜葉枯敗牖歌出聲烏烏唐衢有淚不敢哭痛飲一醉求模糊

半行庵詩存彙卷二

吳縣貝青喬子木

將從軍之甬東紀別

豎儒不自量投身入虎隊戎服夜歸家里老共驚怪排闥
相問訊環集一燈對此行寔鹵莽揄亦吾愛愴茲歲將
暮兵氣昏曖曖雪花大如掌風刮下雲背融入萬竈烟凍
合一天晦明當具刀裹前驅敵王愾今宵姑作歡沽酒烹
野菜四座各贈言書紳以爲佩

酒罷還入內擁髻眎吾婦昵昵閨房中壯夫得無醜十年
結髮情忍遽棄之走吾婦頗會意笑顏承吾後叮嚀數寄

書用慰姑與舅鍵戶相對貧菽水尙多負況今赴行間擔
承在汝手生還定何日中腸欲盡剖恐吾語不祥急起掩
吾口但云好自愛去去莫迴首君當慎戈鋌妾當慎井臼
宵犬隔巷吠靜聞剝啄聲呼婢出門看急足來自城殷勤
將主命流汗走深更主適病在室不得親贈行肩送兩囊
米袖出一書呈書中何所道開讀挑短檠上言急玉事踴
躍趨前程下言勿內顧急難有友生

晨興上堂上長跪別阿父阿父顧而喜雙眉色軒舉爲兒
治戎裝檢視到干櫓迴頭別阿母阿母淚如雨執裾哽不
言示意欲相阻阿父促兒走謂兒計非左區區愁戰死死

綬亦得所生爲蠛蠓臣義當瀝肝腑授兒劍一握入穴刺
蛟虎莫辜大帥恩臨陣或不武行矣早凱旋飲至吾望汝
有奴頗謹厚事吾十載餘恐吾挈之往避去如亡遁念其
執賤役一飽無遠圖疇能繩以義共命相馳驅亦有同袍
友死生矢不渝昨夜軍帖下奔命非一途行行摩敵壘悄
悄于心孤

膝前兩嬌女輾轉爲父愁孩心發危語刺刺不能休長女
膽尤怯急淚承雙眸牽衣門前路怨父何寡謀傳聞鄖山
下礮雲若火流迅雷一聲落轟散千兜鍪蟲蠚有趨避孰
肯湯燖投今父挺身去豈與性命讐少女強解事謂姊無

煩憂明年破敵返看父當封侯

吳山寫望

趙家宮闕舊林嵐形勢猶堪入勝探下界江湖分左右中原天地重東南烽傳列堠連吳越鑰鎖雙門限赭龕詎是疆臣能鎮撫峯頭未立敵人驂

過餘姚縣

縣門晝不開市橋斷人走慘此姚江濱寇退猶未久焚郭留殘塵燎原堆積標歸鳥號空巢燹痕滿林阜番舶昨來窺驚潮恣騰蹂雷轟沸一城莫敢登陴守縣尉出犒師兵危釋杯酒飛白大帥營奇功侈滿口問其折衝才甘言善

低首早使鄰邑侯失地增沮怵征客停短櫓揖問江千叟
攘攘探丸徒乘亂寢相狙逃戶炊烟空劫掠盡雞狗刑禁
官不知一任盜成藪聞戒心回皇啟行日昏黝凜彼宵炬
光刀仗闕蓬牖

入甯波城

乾雪積原野耀日開老晴崎嶇走間道冒凍凡幾程江楫
朝潛渡雲梯暮縋城城中十萬戶雞犬宵不聲詭語恃鄉
導微服窺敵營始知帷幄內羣議徒縱橫決勝在百步十
步有變更憑謀遙憶度焉測彼我情審機豫能定應變猝
或驚安得蔡州將夜半馳神兵游魂夢顛倒搥枕翦厥生

腐儒臨虎穴命擲鴻毛輕憤血中自熱外壓寒氣平艸屨
踐冰互荻炬引路明出險就荒埃邏卒角亂鳴

踰雁門嶺

天上下將軍銜枚走夜分礮枯兵飲雪山響虜燒雲凍吹
揚征鼓寒凌掣戰裙明朝爭獻馘幾隊策高勲

駱駝橋紀事

雲塊大如磐廣漠厚陰積下聞宵濟聲亂次度江磧初焉
近薄城隍黑險分搃龍碩倏四震光搖半天赤中馳霹靂
殊血肉隨狼藉冒燼爭寸功性命孰遑恤前鋒莽突衝後
隊紛辟易朝陽照轅門纍纍見殘骼小挫不復振鳥獸散

無跡主纛遙制師偏牙競陳策三月始定謀襲遠臨邊場
誰知萬天兵怯此數蕃船陣烽愁不開海日慘將夕烏鳶
啄人腸銜飛上戰棚

慈谿大寶山過金華協鎮朱貴及其子昭南陣亡處

日出鼓聲起日中鼓聲死日晡策馬來壁壘見殘址廣場
百畝寬石豐赭如燬野草春始芽腥風吹蕤蕤時有呻吟
聲出自叢骸裏斃馬尤駭人如蝟攢百矢僵臥沙礫中瞪
目猶怒視爾主知是誰酣戰更何似生當上雲臺死當耀
青史我欲洗血臂拾枚認姓氏他日拜國恩四鎮廟同
峙四鎮謂王錫朋葛雲飛鄭國鴻謝肇恩皆前年從
裕靖節公謙先後死難者也今已奉旨立廟

過長溪寺投嶺下農家宿

掘壕松磳根築竈石出罅列幕猶滿山悽此無人夜紺宇
盛金碧入門足悲咤焦土積三尺昨日或臺榭捲地風如
刀餘燼亂騰射衲子賸兩三齋廚啜殘炙就與問戰功冷
語帶嘲罵黃月起大荒罔罔斷牆亞風林颯有聲鬼狐悄
同駕巨壑慘霧屯壞道哀湍瀉所恐記憶真他日夢成怕
盲進踰陂陀喘息扣村舍居民半逃亡藥籥莫吾訝有農
病葉臥篝燈起相迓知我虜腹回款留頻慰藉感此一飯
恩冥報諒宜謝三日亂軍中橐餕向誰假

歸家作

甫失吳淞壘旋破京口營敵至兵卽潰勢若土瓦傾我時
在越郡戟府方請纓聞警懷故里北顧心忤忤吾蘇近瀕
海支港迷縱橫不愁番船至或恐高堂驚謁告急歸視三
日馳兼程闔門一人海騰沸如火坑偵訕亂搖舌駭彼草
木兵城戶避居野野戶奔入城狼藉負輜重倉黃攜婦嬰
明知匿無所皇皇去逃生疆吏職守土家室潛遠行南面
尙失措何怪蚩蚩氓平時不保衛久眎鄉國輕安望捐軀
命殉義爲父兄吾廬僅安堵入門爭笑迎喜我軍中至慰
勞開酒壘燒燈共團坐飲罷荒雞鳴生還有大倖敵愾無
悔情卻聞山堡內揭竿紛起盟富鄰昨遠竄遇盜凶鋒搜

將重之浙營酬程丈

庭鷺

枉贈之作

幸脫歸鄉里重逢話一樽
願心輕虎穴小劫哭蛟門
酒膽隨詩壯燈芒照劍昏
此身猶健在死事愧殘魂

昨有軍中信流言亦孔訛
敵修羊陸好將失鄧鍾
和海上紛傳箭行間倦枕戈
九重頻責問申討近如何

此豈從容日川原靜結營
旌旗九節度涕淚幾書生
堅壁摧如朽連疆沸若羹
宵深看天宇太白正孤明

老父雄心在談深髮指冠
呼兒重赴敵殺賊抵承歡
海氣蒸天惡雲陰蕩野寒
何堪倚閭望凱唱盼歸鞍

明發吳趨市弓刀復遠行
尉佗謀愈狡臣甫憤難平
分帳

朝磨盾連烽夜斫營相期重努力快繫左賢纓

和銀沈幕夜四絕

襜帷心燭共明明巡報紛傳擊櫟聲起立營門看星斗威
弧光自射欃槍

列帳濃堆寸厚霜殘兵幾隊哭金瘡最憐匝地冤雲結斗
大青燐走國殤

狼烽吹燄落江寒檢點征衣血未乾警枕頻番常躍起夢
提長劍斬樓蘭

千觴行酒衆聲嘈奏到饒歌興倍豪孤憤不堪沈醉後一
燈殘夜讀龍韜

詠宋史

汴水紛紛敵騎馳
羞他浪子買和時
邊塵逼近臨京闕
尙有種姚議出師

軍中雜詠詩

大金川八角礪屯土司阿木穰所帥屯兵最勇猛
攻賊甯波西門爲頭隊首當夷礪與土守備哈克
里及屯兵四卡松等百人駢死城內

羶礪腥崗鬱崔嵬
萬里迢迢赴敵來
奮取螯弧誇捷足
百身轟入一聲雷

甘肅西甯鎮游擊黃泰攻賊甯波南門殺賊最烈

賊環攻之突圍不能出力竭自刎死

幾箇將軍肯斷頭英風獨不負兜鍪突鋒冒燼捐軀易難
在鞭刀奮一抽

大兵進剿時江上募水勇備火攻船爲聲援距甯
城十餘里火已發夷驚起駕礮來撲死者數十
人

高駕樓燿夜合圍滿江聲震佛郎機鉛丸如雨烟如墨中
有忠魂帶燼飛

四川守備王國英攻賊甯波西門被擒不屈死軍
中誤傳爲降賊後其子以文尋得父屍函首而返

矢盡脊空一死綏何圖屈膝起羣疑歸元雙目猶含怒想
見銜鬚飲刃時

陝西守備徐官善矛槩攻城時奮入紫薇街血戰
而死刃出於背猶手殲數夷也

陡見鴉羣健鶻來紫薇街上勢喧阗一槍風捲梨花急洞
脅猶能殛賊魁

揚州捕役楊泳率其子弟二十人應募來營皆善
拳勇得少林宗派者也進兵時先令伏入甯城爲
內應後大兵外潰巷戰死者過半焉

倏飛小隊陷圍深技擊會傳自少林狹巷刀光如滾雪何

人援救出核心

前翰林院編修朱楷伏礮甯城外將於開仗時轟
擊夷船旋爲夷所覺朱得脫隨卒二人死焉

奮袖高提博浪椎暗中飛擊勝交綬佇聽霹靂衝車響可
惜多魚早漏師

鄉勇頭目謝寶樹河南人攻賊鎮海招寶山受重
傷同伴負歸駱駝橋前營創裂而死臨絕猶以我
軍勝敗爲問也

垂絕猶思奮臂呼金瘡可奈切劘膚泉臺應自難瞑目未
見轅門獻敵俘

慈溪鳴鶴場土兵爲大軍鄉導死於甯波西門者
六人初當事皆未知後其里人胡我鑒稟白大營
始振卹如例

分引貔貅壓敵營前驅鄉導烈鋒鏖劇憐名未登軍牒議
卹無由及野氓

甯波奔潰後喫夷進犯慈谿金華協鎮朱貴迎擊
於大寶山喫夷受創頗鉅惜無旁援以致覆軍其
二子昭南從死暉南傷而未絕後邀卹典焉

大旗摧倒嶺雲昏陣腳如山屹不奔臣父死忠兒死孝九
京揮淚拜 君恩

侯補知縣顏履敬以運餉至大寶山從朱協鎮力戰死無守土之責者也

飛到仙臯兩舄輕臨危偏是恥逃生果爲百里花封宰誓衆應能守一城

陝西守備陳蘭芝從朱協鎮屯軍大寶山爲後應前隊旣北或有勸陳走者陳曰朱將軍不可負也遂奮入前隊力戰死

偏裨從古重南雷軍覆終能殉主來袞袞羣公麾下將生還方慶曳兵回

朱協鎮所帥陝甘勁兵搏戰最烈雖請援不至終

不奔潰故死者甚衆後見其部曲設位招魂始知陣亡幾四百人凱撤時皆火焚其屍收骨而去

峻陵風雨鬼啼哀火伴臨歸設祭來殘骨一囊天萬里幾家歡聽凱歌回

乍浦陷副都統長喜同知韋逢甲死之其餘則婦女爲多塔塔拉氏暨其女稱姑榮姑尤爲著名者也

洵若狂倭寇故區幾人授命恥全軀他年信史煩彤管須闡幽光到彼姝

夷夷進犯吳淞口陳忠愍公化成登西礮臺督戰

擊退其二船夷幾敗惜後隊先奔避公遂不支猶
力戰夷駕礮船桅下擊公乃死

海蜃妖氛逼幟竿爭看仗鉞奮桓桓睢陽毅魄能爲厲請
劍應先斬賀蘭

吳淞之役從陳忠愍公死事者守備韋印福以下
八十一人時和議已決浙撫劉韻珂謂須與江蘇
同辦故夷來犯云

將軍猿鶴士沙蟲多此鄰疆一戰功成就千秋常廟食休
嫌移禍到江東

甯鎮定陷縣丞李向陽典史全福皆能殉難上海

城破亦惟典史楊慶恩投黃浦死

唱徹臨江節士歌
歌聲流憤滿關河
如何爲國捐軀者
祇是薰丞醉尉多

夷船竄入楊子江
京口副都統海陵
自燔其署而
死人有疑其逸去者
後得其焚餘故衣
始據以入
奏

海門慘淡結冤雲
故壘何堪問戰勲
認取征袍餘燼在
終能勉死謝三軍

幽懷

九鎮潰相州六道阻淮蔡
誰寄專閫權棧域盛旌旛
廟獻

佇抄禽贊勸羣公賴禰牙此誓師刑牲彼蒞會機數既遲
同祖讓漸玩悞醉聽貂帳歌夢斷麟閣繪都尉爭摸金賊
肉安可膾用韓句遂使和親侯王歛策勲最載書盟招羯買
塞延胤僧臣罪紛倖逃帝澤普沾旬撫綏鬼市開坐治
明堂泰

送臧孝廉

紆青

歸宿遷

滔滔東逝水激石翻頽波長風亘迴蕩天半鳴鴛鴦瞻覽
功名際與古何殊科轉疑忠鯁士青史皆虛訛惟君贊戎
幄去留義不頗道合共肝膽志忤無嫌嬰賤子徒內媿對
君顏發醅屏軀挺七尺寸寸供折磨初時袍澤志及此將

云何定知他日返有識叢嘲訶帳中宵起飲擊劍興悲歌
樺燭流憤淚滴入金叵羅驚足戀疲棧矯翼離崇柯逝將
繼君後揮手歸松阿

謁岳鄂王墓感題

淚灑南枝恨莫伸荒塋諱指賈宜人中朝縱道和爲福可
惜金繒百萬緡

趙烈女詩

烈士甘爲知己死死非其主有餘恥烈女義當從一終殉
夫之志何從容女欲死阿母病在牀女欲不死媒妁來登
堂七尺絲繩三尺鐵一撮晶鹽死尤潔誓挈冰心謝故人

不願同衾願同穴我聞爲作烈女行用激壯士肝膽生童
錡殉國身未仕彼哉彼哉公與卿

爲程生

文淵

題江村蠶織圖

婦姑分坐綠窗裏繰車軋軋鳴不已江鄉美利擅蠶桑新
絲出繭三月忙織成去換街頭米寸羅尺縑不著體況今
海國新通商湖絲萬箱載出疆羌奴蠻婢盡文繡機中織
女寒如舊縱使居奇價日高東南益見漏卮漏安得天風
吹海海忽枯重洋不復通舳艫凍死之骨中原無

和韻詠熟梅

止渴其如衆望何此中酸味已無多有人重索梅花笑用

作調羹祇解和

爲管蘭滋題寓樓聽雨圖

涼雨颯然來暗風吹滿耳虛檐寒入夜淒韻夏商徵春人
亦減歡結嚙況秋士棲息一寓樓低顏向吳市鄉夢墮蘋
花渺渺吳興水此味吾飽嘗頻年靡定止淋鈴臥野店打
蓬泊荒汜

仰屋不自庇殷憂滿九州時從雨暘際廬此攬滅愁吾蘇
近海滯積潦恆無收瞦瞦北來鴈覓食江天秋多恐兵燹
後黍地成荒洲杜陵嗟破屋王粲悲登樓占星識離畢曷
若農家流

飛飛幕間燕擾擾盤中蠅飢驅謀一飽百族相類仍彙筆
事奔走憔悴嗟可矜磨龍腐儒骨百年猶有棱逝將息吾
影歸治田幾嗟聯牀接吟侶著屐呼酒朋蕭蕭風雨夜兀
守南濠燈

躬耕祇虛願籌思亦非策官中困轉漕農租歲加額粒粒
輸縣倉管痕猶滿脊今年獨苦旱坐恐千里赤半夜桔槔
聲官河低一尺安得雨如注四野盡沾澤攜榼登君樓志
喜共浮白

自編軍中記事詩二卷爲咄咄吟朋舊多題贈之作
賦此爲答

渴毫狂吸墨池傾灑遍蠻雲總不平蒿目陳陶多少恨翻
教詩史浪傳名

談到奇兵滿紙多居然十萬劍橫磨一從身入青油幕其
奈穰苴古法何

礮雲三載結邊愁大纛臨風帶血收重見吳姬村店裏太
平軍士滿壚頭

底用名山貯石函籌邊策備此中參倘教詩獄烏臺起臣
軾何妨竄海南

滬城旅感

番市申江上浮蹤滯十旬壯心餘涕淚蠻氣壓金銀酒困

牙郎夢花明院妓春輪因猶有膽撫劍獨逡巡

游夷館歸憤而有作

烽火光騰颶母愁無端海蜃結成樓地分鸚鵡棲無定船
走蜈蚣毒愈流和約萬年頒鐵券邊防列帥固金甌鮫人
蜚戶休相煽會見中朝斬黑婁

吳淞口

江海此門戶今誰保障堅島夷開互市埃卒廢屯田猿鶴
當年淚風濤獨夜船何堪重憶舊投筆學防邊

寶山晤張

錦珠
學博

客裏逢人喜相逢況是君杯酬滄海月衣卸故山雲性冷

官偏稱風濤士易熏祇憐經舍外島戶結邊氛

滬濱謁陳忠愍公

化成祠

一戰甬江口督臣死提臣走再戰吳淞口提臣死督臣走
三戰乃及金陵城江濤寂靜噤不聲陳將軍後誰敢兵君
不見走者棄諸市死者長如生長如生尸祝徧我海徼氓

寄故園諸子

天闊雁斜度霜風吹送之羈棲容我在歌哭向人爲一斗
髡常醉三冬朔苦飢連蜷巖桂發未免負心期

舟過長蕩

弭楫遵荒渚環紆入遠村霜枯息林響潮凍縮沙痕出壑

筠新熟連耬稻散屯羨他檐下曝分暖到雞豚

將赴京兆試留別

渾拚浪跡滿關河人海叢中更一過敢道士流多負俗漫
思吾輩亦登科懸金快聽燕臺價對酒難禁易水歌此去
名心緣底切高堂雙鬢漸將皤

秦郵道中

進艇隨隄曲三朝上逆流連櫓開估市缺岸陷城樓鹽筴
千家淚蘆網滿地愁何堪花月夜豔說古邗溝

淮城寫望

遠勢蒼茫落郡樓長堤高堰望中收河流天上桃花水山

掩淮南桂樹秋戎幙飛書感枚叔市兒傳笑惜韓侯征夫
自抱平生恨獨倚涼天寫四愁

王營早發

飯罷出門去四更風悄然殘星明大漠斷角蕩虛烟蹄鐵
臨沙輾馱鈴入夢圓方知川路穩蓬底晏還眠

下邳道中

振轡歷彭城廣原春旛旛交絡睢泗流車行輒紆阻自來
用武地形勢擅中土習俗尙雄鷲殺運不知苦人傑幾崛
興顧盼孰千古徐山悼偃王沛宮弔漢祖王霸同泯泯英
風蕩榛莽殘陽下堞樓寒吹聞戍鼓行役多古懷撫跡足

悲憫

旅店偶題

豕棚牛宮暫息鞍
倦來觀物笑無端
苔通幾板土牆畔
中有蛞蝓搏智丸

郊城道中

河路多夷坦
山路多崎嶇
車箱亂搖兀
三日東蒙隅
沂沭兩交會
蟠麓開陂湖
斜出崢嶸谷
軌跡尤盤紆
黃風動沙積
日腳垂模糊
嗟此帶刀俗
古實文教區
凌夷自何代
發慨來吾徒
驅役晝疲輟
投飲宵乏壚
明發出官驛
珍陽道平蕪

塗次偶成

叢灌紛相引，豁陽古道邊。
雲容霾日瘦，風陣旋沙圓。
廣陌驢綱健，遙岡鷺堠連。
今宵投宿處，應覓酒壚眠。

過寶縣觀蘇子美石刻歐文忠公醉翁亭記

醉翁一記出歐九，自言其樂不在酒。
誰是祜田刻石人，飲不知節幾濡首。
太守之醉真風流，長史之醉多愆尤。
酒食細故一吹索，從此失職歸林邱。
才人畢竟盛文彩，遺跡留傳賢寶宰。
何處風月四萬錢，此間碑碣八百載。
我自滄浪亭畔來，手撫殘字心徘徊。
平生幸未受世枯，酣營何妨日百杯。

渡濟水

濟濱斜踰古趙溝行人來渡石門幽滔滔不似黃河濁始
信清流是伏流

濟北留侯冢

屈指漢三傑報韓淮首功斯人工借箸幾輩怨藏弓末路
赤松子先機黃石公穀城山下路終古此幽宮

汶上弔王彥章

朱梁勢急起登壇五百羸兵奮保嬰自信留皮豹原易誰
知擇木鳥偏難蕭蕭落日渾河走獵獵陰風夾寨寒當代
羞看長樂老倍欽臣節獨能完

河間道中

控轡西馳出武垣老晴天宇豁塵昏雲橫斜照開平甸河
擁寒沙接遠村飢雀遶場空啄穗疲驢投店自知門人來
薊北添豪興時見秋原獵騎屯

登景州開福寺塔

開皇崇象教遺構此間闕塵鞅停來駕香臺攬遶氛淖沲
渡秋色渤碣冒孤雲無限蒼茫意層梯下夕曛

車行書感

燕郊千里程形勢爭北向時繞運河流車行輒心悵旅隊
競相戒前驅挈刀仗警彼鳴鏑徒要路恣剽掠饑饉實迫

之瘠俗習成尙此非急農功游籍食何仰我游入中夏萬
頃地多曠旣患行潦淹又苦驕陽亢穡事豈不勤十九歲
無望禹貢定田賦冀州惟上上水利廢不治富庶日凋喪
安得役萬夫溝洫制重邢京畿稷稻香金穰荷天貺庶幾
北人炊無藉南漕餉荆揚困亦蘇二東歌息唱

雄縣

浩蕩川原走易京吟裝斜壓一鞍輕河邊沙轍迷無路城
上風旗沸有聲燕趙稱雄頻割地宋遼分界日尋盟瓦橋
關畔千秋淚嗚咽常聞灤水鳴

京邸與顧二文彬夜飲

一鞭吟入上都來，劣有襟懷待好開。
篋裏征衫慈母線，燈前歡淚故人盃。
沈沈官漏銅壺靜，滾滾街塵繡轂催。
愧我蕭然行李色，風光不稱鳳城隈。

雜書

圖開督亢古巖疆，駝圖驟鳴下夕陽。
問訊黃金臺畔路，野蒿離立比人長。

五劇車塵倦不堪，酒徒賭興且同酣。
市中大有悲歌士，誰是安豐董邵南。

書懷

銜恤三年廢嘯歌，料量身事奈愁何。
慰情書札天涯少，入

夢親朋地下多氣短俠腸隨病減創深堅骨耐貧磨冬林
槐爾蒼松色歷劫冰天不改柯

病中作

帷風吹冷入匡牀藥餌燈前迸淚嘗此病信由醇酒篤半
身拚共老梅僵灰心自覺寒無焰詩骨依然作有芒一臥
秋園驚日短東籬花事負重陽

病少間贈內

臥聽黃葉打檐聲秋士牀頭夢忽驚母在豈容今日死數
奇偏放此才生夜霜添重寒侵枕冬旭烘晴暖入楹起擁
牛衣話辛苦十旬薪米又煩卿

翟琴峰春山遊跡圖爲毛 慶善題

陋巷三月如窮秋庭草不芳屋打頭誰驅林麓歎到眼涼
翠壓檐凝不流初疑啼髮瀟湘曲九面衡常映寒淥漁父
鼓枻入荒烟山鬼吹燈出叢竹又若匡廬尋瀑布石棧盤
空上無路亂耳春鳴萬壑雷扶筇晝蹕千重霧人生能著
屐幾緇如此溪山洵奇狀黛色滿堂含夕陰迴看卻在生
綃上我昔好作名山遊每逢佳境三日留捫碑大滌洞釣
月巖灘頭姚江夜雪擎輕舟東入禹穴探龍湫翻身北沂
黃河流立馬岱岳窺齊州狂興快若鷹脫鞲徑欲西上黃
鶴樓峭帆飛渡鸚鵡洲南下洞庭雁叫秋蒼梧木落猿猱

愁離江積障橫荒陬傳芭爲弔羅池侯山靈笑我不知止
有願留待他年酬今觀此畫重歎息病中腰腳憊無力稍
康畢竟非天仙靈運無端作山賊十年虛抱幽棲志一處
登臨一相誓竭來仍在囂塵間敢復臨風發遐思橫圖卻
欲偕向君挂壁聊學宗少文巖花礪草競奇秀夢裏攜琴
臥白雲

感賦

兒戲舊時事到今難具論無言慰慈母多故惜衰門才短
遑辭咎途窮易受恩鵲鵲原上鳥對爾淚雙痕

悼程大

集義

閭閻論交二十春
瓊瓊史閣飈輪讀書種子無多在又
弱金閭一個人

送張錦珠公車北上

我昔襍被燕臺游
卸鞍祇許三日留
耿蘭一報夜中至
睒衣泣下黃河流
君今射策燕臺去
馬蹄得意臨風馭
江城楊柳亂飛花
搖鞭直上長安路
香塵紅漲春明門
槐市人爭勸酒樽
蘄雪吳樹三千里
替我迴頭亦斷魂

夜泊毘陵憶甲午歲與朱文綬同舟過此偶得驛牋

水市一聯頗蒙激賞
今又歸道山久矣
追溯舊游補成一律

欹枕微吟記我曾水窗猶是夜光澄
驛牆花媚涼秋露水市人喧向曉
燈此處游蹤渾似夢當年詩思冷於
冰瓣香願爲南豔薰風笛聲中感倍增

揚州

掩冉蕪城柳萬條爲尋勝歷駐輕
槐花開故院紅情減草沒芳堤綠
意饒綺席飲闌名士酒盡橋吹歇
玉人簫竹西漫說繁華地卻稱悲秋
入楚謠

旅感

一雁向南去客行殊未休歸心空
累月短鬢又驚秋微雨歇山縣殘
陽明戍樓何堪搖落候孤艇滯滄
洲

讀陳涉世家

叩門愚客漫驚惶
隴上傭耕語未忘
底事故人皆引去
食言羞見夥頤王

人日偶題

恰喜春來客在家
艸堂白壽酒頻賒
百年願與梅相約
一度生朝一著花

贈徐晉銘

秦淮始識面
倚醉共嬉春
吳市重攜手
傾談過飲醇
廿年仍短褐
初志豈詩人
後會知何地
相逢意倍真

口占

半生書劍夢零星蹤跡天涯怨絮萍萬斛年愁填滿臆只
宜狂醉不宜醒